

# Euro Business

Poslovni magazin EEN mreže u Bosni i Hercegovini  
Broj 3



- FP7- Sedmi okvirni program
- EUREKA
- COST
- ARDA NW i fondovi EU
- EU bespovratna sredstva i uloga Metalurškog instituta u Zenici





# EU NEPOVRATNA SREDSTVA I ULOGA METALURŠKOG INSTITUTA „KEMAL KAPETANOVIĆ“ ZENICA



## ŠTA SU TO NEPOVRATNA SREDSTVA EU?

Nepovratna sredstva Evropske unije su sredstva namijenjena za izvođenje projekata od aktivnosti u vezi sa politikama Evropske unije.

To su nepovratna sredstva koja se mogu dobiti samo kao:

- komplementarno finansiranje (što znači da EU ne finansira projekat 100% nego se traži sufinansiranje i iz drugih izvora)
- sufinansiranje projekata čiji cilj nije ostvarenje profita
- sufinansiranje aktivnosti koje nisu retroaktivne, što znači samo budući događaji,
- sufinansiranje pojedinačnih projekata samo iz jednog mehanizma nepovratnih sredstava.

Evropska unija formira komisije koje na osnovu ranije izrađenih godišnjih ili višegodišnjih programa vrše dodjelu sredstava po pojedinačnim programima za određeno područje.

Postupak dodjele nepovratnih sredstava je transparentan i vrši se na osnovu objavljenih konkursa kojim se definišu zahtjevi koje kandidati trebaju ispunjavati. Konkursna dokumentacija precizno definiše sve neophodne podatke koje kandidat treba dostaviti u prijavi i pijedlogu projekta koji mora biti usklađen sa ciljevima koje određuje konkurs.

Komisija EU sve prikupljene prijave provjerava – prvo formalno, a potom i suštinski i pristupa ocjeni na osnovu kriterija, koji su objavljeni unutar pojedinačnog konkursa.

Nepovratna sredstva se dodjeljuju unutar područja kao što su: istraživanje, obrazovanje, zdravlje ljudi, zaštita potrošača, zaštita čovjekove okoline i dr.

## Uloga Metalurškog instituta “Kemal Kapetanović” Zenica, Univerziteta u Zenici

Metalurški institut „Kemal Kapetanović“ Zenica, Univerziteta u Zenici je institucija koja je kao partner ušla u projekat Evropske poduzetničke mreže u BiH koji je projekat Evropske unije u okviru programa za konkurentnost i inovacije (CIP). Pored Instituta partneri u ovom projektu su: Vanjskotrgovinska komora BiH, Akreditirana regionalna razvojna agencija Sjeverozapadna BiH (ARDA), Univerzitet u Sarajevu, Tehnološki park Mostar.

Metalurški institut, kao naučnoistraživačka institucija sa svojim četrdesetdeveogodišnjim iskustvom, na poziv partnera je rado prihvatio izazov da učestvuje u ovom projektu iz razloga što će na taj način direktno imati kontakte sa privrednicima i njihovim problemima te primjenjujući svoja znanja, iskustva i ugled u poslovnom svijetu, te mogućnostima koje mreža pruža pomoći ostvarenju konačnog cilja projekta koji je ujedno i cilj razvoja jedne države, a to je stvaranje dobrih temelja za veću produktivnost i konkurentnost BiH privrede.

Uloga Instituta u ovom procesu je:

- omogućavanje transfera tehnologija,
- edukacija privrednika,
- pomoć u razvoju novih proizvoda i tehnologija,
- uvezivanje poslovne i akademske zajednice.

Transfer tehnologija je prenos privredno primjenjivih tehnoloških rješenja, znanja i iskustava sa jednog privrednog subjekta (davaoca tehnologije) na drugog privrednog subjekta (primaoca tehnologije). Omogućavanje transfera tehnologije davaocu tehnologije omogućava eksploataciju putem trećih osoba, a primaocu tehnologije omogućava da bez vlastitih sredstava stiče već gotova tehnološka rješenja i time razvija svoj proizvodni program. Naravno krajnji cilj je ostvarenje finansijske koristi. Institut privrednicima pomaže da: nađu partnera, nađu finansijera koji će finansirati ideju, nađu ideju koju će finansirati.

Edukacija privrednika i njihovih kadrova je bitan faktor koji utiče na razvoj kapaciteta preduzeća za inovacije. Metalurški institut privrednicima nudi edukaciju: o materijalima, o novim tehnologijama, standardizaciji i zakonodavstvu u oblasti metalurgije i metalnih materijala i dr. Edukacija se vrši kroz razne vidove: seminare, obuke, naučne skupove, savjetovanja i dr.

Privrednici često imaju problem u razvoju novih proizvoda i tehnologija. Upravo je Institut, kao poznavalac materijala kroz stečena iskustva i znanja sa spremnošću za rješavanje problema, mjesto gdje privrednici mogu dobiti pomoć da njihova ideja dobije okvir spreman za primjenu. Institut će i kao partner privrednicima pomoći u razvoju novih proizvoda i tehnologija, a sve u cilju stvaranja temelja za veću produktivnost i konkurentnost.

Metalurški institut ima veliki značaj u poslovnoj zajednici na uvezivanju poslovne i akademske zajednice. Uvezivanje ovih zajednica Institut vrši kroz: različite poslovne aranžmane i narudžbe, projekte, okrugle stolove, seminare i druge oblike saradnje. Specifičnost Instituta je što neprekidno osluškuje potrebe tržišta i privrede te angažuje akademsku zajednicu na rješavanju problema i iznalasku novih puteva i pravaca razvoja.